

皇

明

疏

鈔

皇明類鈔卷之三十五

援直二

容狂直廣聽納疏

汪思

臣聞古之人君其致治者必受諫受諫者天下必治其召亂者必拒諫拒諫者天下必亂從諫弗咈改過不吝湯之所以盛也至其後世不修祖德智足拒諫言足飾非以其無當之材適致自焚之禍是商之天下以受諫而興以拒諫而亡此一代之明驗也唐玄宗撥亂反正姚宋韓張諸臣論諫建白靡不見用天下肥矣之言誠足傳美萬世天寶以後漸肆荒淫林甫專權伏馬有戒而祿山之亂成矣是玄宗之天下

以受諫而平以拒諫而亂此一君之明驗也其他史冊所載無不可徵是故人君必以聽諫為聖惡諫為愚治亂存亡關係不細臣嘗莊誦太祖高皇帝人臣竭忠成全其君與夫拾君之失擣君之過補君之缺之言未嘗不仰嘆聖人之德上與成湯同符也聖子神孫率遵遺訓重熙累洽天下賴之至於孝廟尤稱盛德正德年間羣邪用事忠諫阻抑天下幾危陛下即位之初首開言路除科道官以言為職務百司庶民皆許踐陳得失莫不乘時自奮以答聖明望治之心陛下聖德摶謙多所獎誘遂使正德之亂轉為嘉靖之隆天下臣民何其幸也當時論

諫既多不無雷同鄙陋臣之愚昧實嘗過憂以為芻
蕘之言恐虞厭棄已而仰瞻聖德無不包容馴至
改元漸不逮始或應之以汗漫或督之以言詞甚或
示之以薄罰一二年間遽不相似此豈雷同鄙陋者
真有以凟聖德歟抑其狂直峻激有以犯天怒
耶然則臣之初憂今見效矣夫忠臣非好訐其君也
食其祿不可不匡其不逮也君而誠賢則曰彼食吾
祿者彼非自為也為吾社稷臣民也彼有蔽吾聰明
而誤吾國家者可誅彼有徇吾意欲而竊吾寵位者
可誅彼有為吾愛民情壽國脉正王法陳治道者則
可賞者也陛下豈未嘗如此一思乎昔唐臣陸贊

告其君曰臣之進諫有失中君之納諫無不美諫者多表我之能好諫者直示我之能容諫者之狂誣明我之能怒諫者之漏泄彰我之能從然則諫而失者賢君猶當誘之以來天下之善况其諫而得者既不能用乃又從而罰之乎臣請以近事言之如東廠受民人趙紀告詞奏拏知府趙允臯科道官兩次會題正其非法陛下乃曰趙紀所告係平人命重情又贓私數多特差官校拏解來京待解到之日朝廷自有處置你每如何又這等來說章僑會本之外復獨爭之陛下又曰趙紀事情待一干人犯拏解來京之日問理明白朝廷自有處置這給事中如何這等

來說顯是輕率妄言本當查究且饒這遭還罰俸三箇月又日來賞罰無章 命令未善李學曾請定議條格并悉付內閣以杜私謁 陛下又曰朝廷政事自有舊規這給事中如何這等來說顯是輕率妄言本當查究且饒這遭還罰俸一箇月 天怒所加朝野驚愕豈但諸臣惶懼失措凡使明目張膽欲抒愚衷論大計者亦皆望風退縮不敢復為撩蛇履虎之事矣以 陛下如此聖明而使臣下有諱言畏諫之心其為累豈淺哉况 朝廷成法謂東廠不得受狀駕帖不得出京非謂趙九臯不可提問也查得趙紀曾以前項事情兩具奏擾未嘗一言及人命贓私一

節該衙門勘破奸弊已經叅看立案不許奸謀未遂
乃輒添入事情捏告東廠此亂法梗化之民所當懲
治不赦景賢不思例不應受法不應行乃輒具奏以
惑陛下及經論劾之章更肆無理之辯遂使陛下
下反疑諸臣之言為不足聽諸臣豈不知人命至重
哉豈不知贓罪可惡哉平時內外貪酷官吏科道嘗
糾劾罷職未嘗少恕即如近日東廠管事千戶陶淳
接受宗源銀兩歲逼鄒與至死諸臣曾以告之陛下
下豈於九皋乃獨欲脫之耶陛下於淳已明之獄
止革營事尚未遽罪何獨於九皋之未經勘實者而
致嚴如此耶臣愚以為此非陛下本意必左右惑

之姑飾詞以相應耳又況提解問理則有司存獄之既成自合請旨何勞朝廷之屑屑處置也其不幾於行臣職邪至於李學曾之奏中間所論多及貴近羣情衆怒讒言競興必有以激陛下之怒者所謂欲加之罪何患無詞也不然則如景賢受狀之變亂成法不以為罪而空言建白者乃抵之罰耶是皆臣之所大惑也夫臣而狂直輕率以犯君上者罪也臣而緘默阿順以誤國家者亦罪也然而犯上之罪得罪於一時誤國之罪得罪於萬世今陛下方赫斯怒詰責諸臣而臣復以狂言冒犯斧鉞豈臣之太不忌避哉亦恐得罪萬世不可以自逭耳

又况陛下本来好諫冀克有終豈期不一二載遽爾大相遼耶故臣愚日望陛下改之不敢謂陛下畢竟如此也孟子曰謂其君不能者賊其君者也臣之所以狂言不敢負賊其君之名也伏惟攷商室之興亡鑒玄宗之得失敬皇祖之遺訓嗣孝廟之芳聲俯察愚衷少加采納并將先次會題及李學曾章儕所論重賜詳覽與四大臣商議改正收回李學曾章儕罰俸之命更加獎誘如此則豈特陛下君德增盛斯實宗社無疆之休也

弘聽納以別淑慝疏

王時柯

臣聞伊尹告太甲曰有言逆於汝心必求諸道有言

遜于汝志必求諸非道孔子曰君有爭臣則無過舉
父有爭子不陷無禮故子從父命奚距為孝臣從君
命奚距為貞夫能審其所以從之謂孝子貞臣矣以
此觀之則臣子之於君父言之順逆命之從違孰是
孰非孰孝孰貞 陛下當知所擇近日桂萼輩緣議
典禮逢邁機會 聖心簡在傳陞美官吏部考功清
吏司員外郎薛惠湖廣等道監察御史陳相段續鴻
臚寺右少卿胡侍上言辨解連章論劾雖不避齒君
路馬之嫌實求盡臣子諫爭之職 陛下之心豈不
以為承順者之為恭而拂逆者之為忤諸人之見亦
豈不知從之則順而有福拂之則逆而有禍誠不敢

爲身謀坐視姦賊爲國家蠹爾臣聞典禮雖天之
叙秩而惇庸則在乎上德罪原天之命討而刑賞則
主乎君寅恭之協政事之懋臣亦與有責焉此數臣
者言雖過乎有激心亦諒其無他然直道難容枉道
易合正言難入邪言易從此其所以天威震怒
聖衷莫回于萼等益堅倚任之心于諸臣益致猜嫌
之忿臣愚以爲陛下猶天地父母也群臣雖有遠
近親疎尊卑貴賤之不同其言雖有順逆從違可否
承弼之不一而其實爲天地中之萬物父母中之嫡
庶子則一也今以一議禮之故而諸人超遷群言譖
罪或擒下詔獄或左遷外任臣恐海內聞之以爲

陛下私于庶孽之邪媚忘其嫡長之孝貞抑且乏天
地包荒之量而有日月照臨之私 陛下之淺深從
此可窺而桂萼輩坐要美官安享厚祿寵遇日隆揚
揚自若而群臣緣此坐罪舍其榮遇而甘僇辱自非
喪心病狂何至于此而桂萼輩肆以巧言上激 聖
怒已要忠誠之名而使臣工皆為誹謗已固取寵于
上而使人得罪于下已方曳履 朝堂而使群臣
遷逐外境已叨金馬玉堂之榮而使群臣蒙械繫
楚之辱士君子忠厚仁恕之道殆不如就此使其論
為正其人非邪臣不知其何說將以自解于天下後
世也就其中論之席書耻與同事蓋天理之復萌方

獻夫復膠前說實人言之有激而張璁桂萼堅執前
非大肆報復使其為席方之唇舌二人且不屑之而
其假借人言以為已重二人且掩避焉是又欲為席
方之唇舌而不可得者臣查得弘治年間事例文職
傳奉者黜退為民而近日蝗飛蔽天識者以蝗虫為
嘉禾之蠹亦猶儉邪為正士之害變不虛生理之先
見臣觀漢唐黨錮之禍其始也蓋欲快己之憤其後
也至于亡人之國卒至其身亦有所不免此其載在
史策班班可考伏望 皇上畏 上天之變守 祖
宗之法 採忠直之言消朋黨之禍將薛憲等特
賜寬宥胡侍復還原職以示 優容方獻夫席書

其辭免以全名節張璁雖已到任桂萼患病未出乞勑吏部改除別職庶不違弘治年間之例而諸人亦得齒冠裳之列陛下欲保全諸人而諸人欲以自全者其計不出乎此臣觸冒威嚴無任戰慄隕越之至

乞貸直顙近臣以昭

聖德疏

張翀

伏見頃者聖心獨斷大禮告成多士盈庭噤不得語而翰林院編修鄒守益修撰呂柟感激於衷各具陳奏詞指直顙觸犯雷霆節奉欽依鄒守益這廝出位妄言不修本業既知忌憚又來瀆慢好生輕意着錦衣衛拏送鎮撫司打着問了來說呂柟這廝不

修本業累次輕率大禮已定了巧撫妄言故違前旨
好生忤慢着錦衣衛拏送鎮撫司打着問了來說欽此臣等聞之子路問事君夫子曰勿欺也而犯之禮曰近而不諫則尸利也竊謂撫與守益秉不欺之朴忠職今日之侍從不識忌諱有可矜憫况之二臣者皆以掄魁之選夙負時名當先帝時分甘岑寂求志林下者十有餘年幸逢聖明龍飛相與淬礪激昂願立于朝以各行其所學一時正人端士動色相賀誠見陛下寤寐豪英登延忠讜有以昭古帝王聖哲聰明之政成正大光明之業於億千萬年之遠也乃茲相繼以言獲罪束縛繫繒事出不意

耳目夫之二臣者苟以顧望畏懼陷陛下于有過
之地則在聖明自有應奏不奏之律其誰敢議之
而顧以其有指訐之私刺譏之迹必置於理不少假
借此固臣等之所未解也夫諫鼓之置謗木之立葑
菲之采蕪蕘之詢古之帝王尚欲取一得于千慮之
餘求無過于有過之內而陛下特以二臣之言苦
而難入有此舉動就使其言籬疎無取引喻失宜未
能盡當聖心此在陛下聽不聽之間也而何必
深罪之也耶之二臣者非不知諸司百職各有分守
但以事體舛誤關係匪輕所司既知其不可而未能
盡言臺諫時或有言而未能盡徹九天之聽用此

越職冒昧不敢愛身自古懇直之臣以言得罪皆足
以為盛德之累故英君誼辟往往含垢納汚以示
包容彼非不能強愎自遂特所惜者後世之名耳
陛下御極之初大開言路天下翹首跂足思見 祖
宗堯舜之世而比日以來數罪言者有志之士人懷
疑懼 陛下以泥沙視今日之人材不甚惜此所謂
以有限之士而恣無已之誅臣等恐傳之天下垂之
史冊將謂 陛下塗耳目之聰虧清明之治索忠義
之氣孕危亂之胎在此舉矣伏望 皇上大恢聖度
少寧 天威念狂直之無他思壅塞之可畏特將
相鄒守益二臣 俯賜矜宥仍令以原職從事則

聖德廣大 聖政光明有以媲美堯舜而追配 祖宗此臣等之願也 宗社無疆之慶也

應詔陳言以彌災變疏

周天佐

臣竊惟 陛下以 宗廟災變痛自修省凡政事闕失許各銜門條陳且欲務關 國體民瘼不許泛濫彌文虛應故事仰見 皇上畏天之誠求言之切治道更新之會轉災為祥之機也大小臣工孰不感惕思效其愚乃今闕政猶有在而忠言未盡聞此何故與實以 聖明采察之度未弘而臣下畏望之心猶存也蓋示人以言未若示人以政求言之切乃示人以言耳而御史楊爵之獄未釋是未示人以政也臣

特即欲冒昧上陳但聞詔書且下意曠蕩之恩必首及楊爵今復不蒙恩宥臣展轉思之心實未安况明旨既許條陳苟有所見寧忍終默國家置言官以言為職楊爵所言之事豈逃睿見惟以過直犯怒誠可矜察而爵今在獄中已經數月且聖怒之下一則曰小人一則曰囚犯以盡言極諫為小人則為纖默逢迎之君子不難也以奉職納忠為囚犯又孰不能為容悅寡過之臣哉言行君子之所以動天地达人君一喜一怒上帝臨之陛下試一思焉其所以怒爵而罪之者果合於天心否耶昔人有為雷霆之所摧折萬鈞之所覆壓者爵既遭矣身

非木石命且不測萬一先朝露而殞是使諍臣飲恨
直士寒心楊爵一身之利害不足深惜而所關係
聖德之損益不細也方今陛下恭默思道畏天勤
政聖心洞然臣願察爵之疏原爵之心特錫釋
放仍乞明示嘉納不吝採行旌爵之忠謙以風天下
之直則聖德如天地之廣如日月之明由此而天
意不回未之有也

開言路以圖新政疏

王官

臣讀近日朝報該給事中李學曾章僑主事林應
驥為建言回詰事奏奉聖旨各罰俸有差臣反覆
思惟不勝驚懼切謂李學曾等所言俱剴切忠直其

於新政深有裨補在陛下當欣然嘉納以獎言者而乃罰俸罪責為阻塞言路計耶臣聞人君之治天下以用言為先故人言之用不用言路之通塞攸關言路之通不通天下之治忽所繫歷指前代明有徵驗不敢備述臣請略舉我朝之治耳目所及見聞者為陛下陳之昔我孝宗在位時御經筵勸學好問退朝之暇延訪儒碩咨諭治理至於臺諫及諸臣言議罔不嘉納而俯從之故其十有八年之間令出唯行信賞必罰海內晏然軍民樂業及其往也天下至今猶思之慕之而尚冀其復出也此無他用言故也其後武宗繼立好尚武略不御經筵選

之穀惟異類邪術之人雜侍左右日與狎昵晝夜領
領外事廵遊極諫忠言扞格不入故其十有六年之
間政出多門賞僭刑濫海內騷然幾致大亂及其往
也天下至今猶恐之怨之而惟恐後之繼今者復若
是也此無他不用言故也夫同此天下一傳之間而
忽懸異柢在人言之用不用焉關係良不小矣伏想
陛下毓德藩邸之時已嘗知之方其入繼大統天
下臣民之所仰望于陛下者不但直如孝宗而
已蓋將以光舜禹湯文武而深望之也今纔二年耳
詔令不信刑罰不中名雖嘉靖之維新實多正德之
遺弊一時中外之臣咸懷忠良因事獻納各圖報稱

豈意陛下以忠爲妄以諫爲擾以臣下養廉之資
爲朝廷罰贖之具一至此乎臣恐天下之事其所
由來有漸者其幾也易曰惟幾也故能成天下之務
蓋禍患之幾歲于細微而非常人之所預見及其著
也則雖智者不能善其後矣故聖人于幾則兢業以
圖之今日之罰俸雖小然無已則將籍忠良之口壞
耳目之司必有禍患之來奔潰決發而不可收拾首
其幾甚大也陛下於此將欲爲孝宗耶爲武
宗耶將欲安天下耶危天下耶爲孝宗以安天下
則臣民安而陛下亦安矣爲武宗以危天下則
臣民危而陛下亦危矣夫豈況然身外之事不切

於已者 陛下可不早見而預防之哉伏望 陛下
將李學曾等特 賜優容收回罰俸之 命於其所
言事理一一聽用行令益恭厥職勿替初心仍將嘉
靖二年以來大小臣工奏章通行查出 燕閒詳覽
如欲 陛下時 御經筵日近元老者其言可用也
必用之如欲 陛下讀大學衍義溫習講章者其言
可用也必用之如欲 陛下停齋熊慎近習遠聲色
重刑賞者其言可用也必用之以至一事之建白一
政之匡救一 命今之封駁務必考究可否採擇施
行用集衆人之長以成一人之治庶乎慎終如始鑒
武宗之愆成 孝宗之美中興之道無踰於此不然

則權移左右害及臣工深成欺罔之奸重致敗亂之禍其去正德之世無幾矣又何以新政為哉臣愚犬馬懷私不容緘默用是昧死冒瀆伏乞陛下試垂聽焉

乞遵成憲保全諫官疏

鄭一鵬

臣聞古今稱人君納諫為盛德為難事非諫之難從也自古諫者言不切直則不能動人主切直之言常至苦口逆耳而心實忠愛此聖主所樂聞君子小人所恃以進退天下所倚以安危治亂之機也夫舜大聖人也成王大賢也丹朱商叟大惡也禹戒舜以無若丹朱傲慢遊作傲虐周公戒成王無若商王叟

沉湎酣于酒德自常情觀之悖慢孰甚焉而舜成王
樂受之不以為嫌唐虞成周之治萬代莫及豈非納
諫之美哉至於周昌以桀紂比漢高帝賈生以亡秦
喻漢文帝汲黯諫武帝內多慾外施仁義群臣皆為
黷懼武帝稱其為社稷之臣此三君者不惟不罪諫
臣且曲加獎勵不如是不足以來天下之直言也洪
惟我祖宗以納諫為家法太祖視朝罷召六科
給事中諭曰朕日臨百官可否庶務或有失中者
爾等宜直言無隱又顧翰林學士曰敢言之臣難
得所以王魏之風世不多見若使進言者無所忤天
下何憂不治是我祖宗固以言責諫官也仁宗

諭楊士奇曰近日覽群臣之意甚好事或未當輒封
章進來朕每聞群臣言未嘗不反覆思之或吾言有
過未嘗不悔則當時諫官之言皆蒙容納也他如給
事中柯暹御史何忠言事評直尚書李慶請罪之
太宗曰敬天故求直言朕正欲聞過爾請罪之是欲
朕為何如主大理寺少卿弋謙言事煩瑣免其
參自是言事者少仁宗召楊士奇曰朕非怒謙言
事但其言有過當者爾可諭衆人以朕之實心遂
命士奇書勅引過命謙如舊朝參令百官言事
無以謙為戒則當時諫官言事雖評直煩瑣者不加
罪也凡朝政有缺大臣有不公不法者科道于奏

事時當 陞面劾土木之難給事中王竑面劾群奸
至手擊錦衣衛指揮使馬順以死則當時諫官皆得
面劾也故當時 朝廷無缺失之政臣下多譽譏之
風以開億萬年之業端在于此洪惟 陛下臨御以
來兢業思治寤寐求言臺諫章疏一一採納士無賢
不肖咸思竭忠悃以為千萬載一時也比來勵精之
勤頗衰于往昔聽納之美少渝於初志近給事中鄒
繼曾以言事忤慢致蒙 皇上赫然震怒下之詔獄
繼復調外任夫繼曾信有罪矣不過欲 陛下慎重
綸音以示天下以傳來裔以觀四夷使天下後世四
夷稱為光舜主斯我 祖宗所樂聞在 陛下新政

之初樂受而舉行之者也柰何反怒而罪之耶夫忠義正直之氣數百餘年培之而不足一旦壞之而有餘在先朝逆瑾寧彬用事內外叡惑諫官言事一切構以奇禍遂使諫諍路沮姦佞秉權天下幾乎大敗而不可為仰賴陛下改絃更化表忠納諫士君子之氣為之一振夫何不一二年而復蹈之邪且繼曾所以感觸諱忌者以聖德容納所致耳若加之以罪其誰不愛身重祿縱有大奸大惡如逆瑾寧彬輩誰敢為陛下盡言以身試不測之禍哉縱言之彼將恣肆無忌朝廷設諫諍耳目之臣顧如此國家何賴焉且今士大夫苟有一善可稱皆思自愛

惜保全恐虧令聞以陛下之孜孜求諫固可以躋
舜禹配祖宗天下四夷稱頌未已乃今以言語之
失罪諫諍之臣無迺為聖德累耶今天下郡國災
傷者十居八九江淮之民父子兄弟相食操耰鋤棘
挺而起者州邑相望桃李冬華冰霜夏隕山谷崩墜
天鼓鳴震白氣晝見雷電失時地震于元旦之日南
直隸以達於河南浙江陝西等處不期同日臣歷觀
史傳未有災異若此而天下無變者也陛下於此
之時正宜下詔求言上下交修猶恐天未悔禍而
大臣以讒間逐小臣以言語罪以此銷天變而召和
氣臣未之聞也且近來臺諫言事比嘉靖初年十少

七八矣 陛下前此初未嘗以言罪之也特以 聽
納少倦或違忌而不敢盡今繼曾若復補外誠 恐群
臣以為 陛下真有厭棄言官之意將相率緘默則
言路從此沮塞姦謾從此競進天下之理亂安危未
可知也伏願 陛下念天變之可畏民窮之可惜思
忠義正直之氣養之難而傾之易將繼曾收回 成
命俾照舊供職以為進言者勸仍願自今以往不復
以言罪諫官評直者容之狂妄者怒之以作其剛毅
果敢之氣默銷其懦弱不振之風則君子道長小人
道消自可以合德 祖宗齊美虞周實 社稷無疆
之休臣不勝惓惓之至

宥狂直以光聖德疏

韓楷

臣聞人君以用言為明人臣以進言為忠用言者不當計其言之遯逆進言者不當計其身之利害皆惟其理之所在何如耳矧言官職司獻替義存舉正言及乘輿天子動容事關廊廟寧相待罪法固使之然也豈得謂之沽直近名而必欲其嚙伊脂韋以自媚耶歷觀古之帝王未始不以求言為先務後之英君誼辟乘時有為而其間言路之通塞治道之否泰未始不相關焉陛下升潛勵精圖治虛襟受言海內欣然庶幾復見帝王之盛而行之未久持之靡堅一二年未頃不如初頃者給事中鄧繼曾上言

綸音嘗審 陛下罪以輕率忤慢竟繫 詔獄未蒙

手續

釋放夫一繼曾不足惜也第 國體所關為可深惜

耳庶之衆庶愚頑未易戶曉 一經聽聞轉相驚愕必

謂清明之 朝且諱言矣 聖明之君且拒諫矣流

傳四方關係非細況夫災變日報 天怒方殷盜賊

肆行民窮日甚此正下 詔求言之際豈可反以言

為罪哉臣切聞之人君之度天寬地容人君之德海

涵春育今宥一繼曾於 聖德未必有損罪一繼曾

於 聖德未必有光何也繼曾以言為職者也而以

言為罪於繼曾何負焉使 陛下始言下之獄矣而

終釋之則天下之人必將皆曰 陛下之所以優容

直言也如此 陛下之不牽制於近習之私愛也 如此天下之頌 聖明者皆集於 陛下矣如此而謂於 聖德有損不謂之欺罔臣愚未之信也使 陛下始焉下之獄矣而竟罪之則天下之人必將皆曰繼曾以言職獲罪也如此繼曾無負於 朝廷而朝廷竟不之察也如此天下之頌忠盡者皆集於繼曾矣如此而謂於 聖德有光不謂之欺罔臣愚未之信也况天下惟中才最多故古之帝王常矜容愚狂以作士氣若謇謇諤諤者不蒙甄錄而憊憊欵欵者竟見摧折將相顧驚駭率為誕謾諍臣噤口直士咋舌 陛下將誰與共理耶此風一長教俗競成求

疵索瘢無所底極刑獄寔繁法網太密甚傷清議大
鬱輿情豈所以望於治世者耶亦豈所以望於陛下
者耶臣與繼曾並列言官知繼曾之當進言而不
當以言為諱知朝廷之當用言而不當以言為罪
耳他固非所恤也惟陛下留神省察則宗社幸
甚天下幸甚矣

宥狂直以開言路疏

黃仁山

臣等近聞兵科給事中鄧繼曾以言事觸犯忘諱致
蒙陛下之錦衣衛獄夫繼曾之言事過當誠為
有罪矣而詔旨太峻譴責太嚴驚駭物聽不亦為
已甚乎恭惟陛下御極之初開廣聰明大闢言路

雖有拂意逆耳詆訐狂妄之言尚能虛心以聽俯就延納其時天下之人歌詠頌歎以為古之聖帝明王亦不過此是以先朝之積弊大害一旦悉舉而更張之而天下帖然以無事夫何未及二年之久而陛下聽諫之美漸不克終前既怒劉寗之言而深斥之矣茲復怒繼曾之言而繫之獄焉臣等深惜聖明在上而乃有此舉動也繼曾身在言責有所見而未安於心者不得不以上聞以效一時之愚陛下不以其言為然猶當寬大含容未宜遽棄今乃囚之於幽禁之中苦之以桎梏之慘若將有大辟重辜而不可少恕焉者不識陛下何忍於繼曾如是哉

臣等递知非聖意也蓋恐欲竊政弄權之人假此以激怒陛下或摘其剴切之辭而目之曰此乃彰聖上之過也或指其狂直之語而名之曰此乃譏詔旨之非也凡可詆毀無所不至陛下不察赫然震怒而墮其計中耳殊不知近侍之威權既重則陛下之耳目自壅臣等恐忠直由此而解體臺諫由此而咤舌目覩時弊口不敢言將來主上之過失孰從而規之朝廷之疵繆孰從而舉之臣下之奸邪海內之休戚孰從而指陳之假使其時或有弄權蠹政荼毒海內如劉瑾假寵納賂濁亂朝政如錢寧江彬諸人陛下何由一一知耶况今天下災異疊

見東南之死辱成丘盜賊之生發不常人民之艱難
已極 陛下視今日為治耶為不治耶正宜重軫
淵衷思圖治理豈宜輒罪諫臣自生蒙蔽伏望 皇
上廓日月之明 大乾坤之量思 祖宗建立臺諫之
意 故繼曾狂妄之愆復繼曾原任之職以開諫諍
之門以作骨鯁之氣使天下知 聖明之世決不以
言罪人尤望自今已後凡有奏章必付閣下票 旨
詳議而行務使事體歸一如此庶幾納忠之人猶有
效忠之願破奸謀於欲肆激忠義於將靡 社稷之
福多矣非特臣等之幸也

宥狂直以安 宗社疏

葛鳴

臣惟大臣進退繫天下之安危忠諫從違闢 朝廷

之理亂故自古至今未有不以受言而興任人而治

者也頃者大學士楊廷和以道事 陛下至于不可

再躡引辭 陛下輒准致仕給事中鄧繼曾以言事

忤旨 陛下怒而下之獄 一則輕放大臣果于不

任股肱一則罪建言官顯示自塗耳目臣以為此天

下治忽之機 乾坤轉移之漸所繫至不小也 陛

下若以廷和為衰老可去則 國無老成人古所甚

惜况堂堂 天朝耆舊不滿十數人 祖宗儲養四

五十年以遺 陛下者忍令一旦棄之邪若以廷和

為執拗則古人在中書有封還詞頭者有對使者引

燭焚手詔附奏曰但道臣沆以為不可者其君未嘗
以為執拗而當時致治之盛至今可考也廷和不撰
織造 勅書乃為 陛下社稷謀非徇其欲而身是
圖者 陛下何不鑒其忠而乃厭其執拗耶若以廷
和議禮不能仰承 陛下之孝思則其所議于古未
嘗無考據于事未嘗無兩全非如造妖狸恠之徒駕
邪說以熒惑 聖聽者至如功在 社稷則 諒旨
亦嘗許之矣胡迺以萋菲之言而遽聽其引去邪傳
說之告高宗曰有言逆于汝心必求諸道有言遜于
汝志必求諸非道繼曾所言所謂逆于心者 陛下
若矜其狂而求諸道未始無益也今以其言詞之忤

慢不惟不聽又從而罪之山數藏疾川澤納汙瑾瑜
匿瑕國君含垢天之道似不如此假使繼曾所言悉
為過當 陛下亦當念其官以諫名理宜廷爭于以
少霽 天威用存國體以倡言者之風可也不然則
隨行結舌亦將焉用彼為矧其言若有可取 陛下
乃加之以微纏臣恐将来人懷覆車諭臣杜口天下
事不知何所底極也方今山崩水湧雷震天鳴或白
氣亘空或五星聚室至正旦地震徧滿寰中根本之
區災異尤甚內而列如人相食外而邊境乏軍儲此
皆 祉稷之憂天之所以警戒 陛下者至矣臣每
一讀報不覺涕泗交零 陛下深居 法宮之中不

知曾一言及否也今流民囁聚為賊已漸不可撲滅各邊夷狄亦聞窺伺萬一長驅深入以戰則多疲兵以守則多餓殍當此之際何以支持計今正宜任股肱以資啓沃之方廣耳目以決壅蔽之患豈可引去者聽其去進言者罪其狂哉伏望 皇上仰思 天命之難謀 倏念四方之多故收回廷和致仕 成命使之展布四體益竭忠謀左右大猷股肱王室將繼曾速 賜赦出以旌直臣從此日坐便殿召廷和輩數人與之揚確政事清心寡慾端本澄源一意更新追惟過誤公好惡以登材俊抑偏聽以杜私門罷傳乞以重 王章節浮費以養材力振敢言之氣用

廣聰明停織造之官培植邦本如是而天下不治者臣未之信也若以臣言妄誕棄而不錄臣恐将来多事方勞聖慮豈臣所能預言亦豈臣所忍預言哉伏望陛下省納臣言必見之施行臣不勝幸甚宗社不勝幸甚

宥言官以存國體疏

梁世縹

臣等竊聞人君以兼聽廣納為明以藏疾匿瑕為量明無不照則邪佞不敢奸量足有容則讜言日益進是故逆耳之言明主之所亟求而直言不聞識治者至以為甚於災變之可畏也近該給事中鄧繼曾以睿旨不聞於內閣而建言遂失之踈狂儻非涉之於

疑則必聞之有誤要之忠直之過也 陛下責之寧慢誠是也下之 詔獄得無太甚矣乎臣等聞之既驚且駭將信而疑以為 陛下即位之初既詔科道官照舊言事矣今茲舉也無乃 聖意之少違耶臣等竊惟國家之治否由言路之通塞體勢所在關係匪輕自古視人國者每先之此固 陛下之所洞鑒者也夫繼曾之所論建其中詳悉固未及知觀其大意以王言為重耳臣等敢以為本無邪心也非為身家謀也在昔商書說命有曰王言惟作命記曰王言如絲其出如綸王言如綸其出如綺蓋言所係之重且大也如其善而莫之違則一言有興邦之利如或

未善而莫之違則其害又可勝道哉繼曾之心疑有
見於此又以身爲言官職專封駁言不激切不足以
動陛下之聽用勤效忠之益遂爲納約之規是誠
可罪也原其情誠非爲身家謀也實本無邪心也罪
亦可恕也况夫古先哲王每以爲聰明有限治亂靡
常從諫者昌自用則小於是乎植旌置鼓立木垂輶
以采夫諫矣慮其不諫也於是乎假之以容色喻之
以德音又恐其言之不直也又於是乎有金帛之賜
衣馬之賜惟欲必聞其過而後已以至於言之難受
者則每置諸包荒之中事之所無者亦必以爲先害
之戒固未嘗厭薄言路而罪之也古之諫官言及乘

與則天子改容事關廊廟則寧相待罪又未嘗以言受責也故唐臣陸贊進言于其君曰諫者直示我之能賢諫者狂表我之能恕今繼曾之言直矣狂矣能恕能賢乃陛下之美德今茲罪之得無少損矣乎且我祖宗以來設官分職獨專以言責寄_{史料道}百餘年來扶持紀綱恢懼奸邪多有賴之未聞以進言而下獄者惟正德年間乃始有此其時其事鑒戒顯然陛下之親燭也豈以為盛德事耶今一繼曾固不足惜所惜者國體之所係治否之所關耳蓋人情畏懼者衆剛直者稀自茲以往事若有大於此而難言者誰為陛下言之哉夫天下事至於人不

敢言則國事之可畏者至矣言之誠可於邑况今災異頻仍饑饉又甚天見變則五星聚於營室地見變則震動聞於四方人心危則盜賊充斥於各省尤可傷者鳳廬江北父忍食其子夫忍食其妻道無完骸野無生意此仁人之所不忍道也 陛下正宜大下哀痛之 詔廣求消弭之方不憚於省躬不難於聞過庶幾上答 天意下回民生甚不宜以言為諱而況可置之於法也哉傳曰主聖則臣直又曰唯明主可以理奪在昔誼王或聞諫而怒後悔怒而賞之書之史冊後世以為美談如蒙乞賚 天威將繼曾出之獄而薄其責恕其罪而復其官用以嘉夫忠直因

以勵夫將來則
陛下納諫之美名容受之盛德治
光前軼後垂世亘光而休明之治此其基之矣臣無
任懇切之至

廣至明大英斷以昭盛德疏

謝汝儀

臣聞人君之德莫大於明亦莫大於斷通者邸報傳
布海隅竊聞給事中衛道御史丘養浩以言忤
陛下尋用諫者之言復其官天下鼓舞翕然稱
陛下之至明太熙崔文罔上專權
陛下一察其奸即
賜罷黜天下鼓舞翕然稱
陛下之英斷雖古之聖
帝明王從諫弗咈去謗弗疑與三代以下英君誼辟
聞善如轉圜不爲佞人所惑者何以過此真足以配

休百王垂光萬代也臣又聞御史張袞因春時和欲
陛下憲天行道乞將因議禮充軍為民降調諭德等
官豐熙等量加放還錄用奉 聖旨該部看了來說
中外欣然翹望再造之 恩既而奉 聖旨曰罷豈
聖心尚疑於孝道有妨不無芥蒂於中邪書曰后從
諫則聖中庸論舜之大孝則曰德為聖人蓋帝王盛
節莫過於此尊親要道惟斯為極孝固在此不在彼
也豐熙等學識偏隘不能上承 聖意罪固狂愚也
陛下震之以雷霆之威放之謫之已足示罰歷之以
歲月之久慮之危之其悔已深從而宥之當有可觀
請者雖頻未蒙 俞允今日正 陛下當憐恤之

也何者伏聞諸臣傷于急迫因篋物故為類頗多
已非盛世之事矣今死者不可復生幸而存者尚賴
回春之舉臣愚以為陛下之聰明仁恕諸臣之在
竄逐者終當仰被休光但恐鬱鬱於行伍卒徒之中
依依於下寮編氓之內今歲無一人焉明歲無一人
焉歲月既深易損易失人才難得成就之難而廢棄
之易陛下他日縱憐而用之亦何及乎在諸臣萬
死固甘於臣陛下聖德不無有損張袞之言所當急
從也臣又聞御史喬祺極論內使谷大用不當取回
康陵司香欲陛下防微杜漸收回成命奉聖
旨該衙門知道中外駭愕延佇追奪之命日久未

見舉行豈左右者為之先容 聖心不無眷戀於中耶易曰履霜堅冰至姤之初六則曰羸豕孚蹢躅蓋履霜之微而知堅冰之漸因豕之羸而逆蹢躅之孚皆喻君子之于小人貴防其漸也谷大用之罪惡重大皆莫逃於 蘆鑑不假臣言也 登極之初執而付之法司真足為曠世之舉而 聖恩浩蕩竟逭其誅已不足以洩神人之忿一旦無故從而用之禍機所伏誠為不測今日正 陛下當急防之時也何者徃歲起用王堂天壽山守備臣嘗抗疏論之未蒙施行未幾王堂且守備南京矣今去王堂守備歲月曾幾何時復有谷大用之 命臣愚以為 陛下之聖

神文武左右者欲顯用奸惡固有所憚而不敢惟其鑽刺審緣甚秘而援引招置甚巧今歲用一人焉明歲用一人焉萬幾之煩豈暇畢照一墮其計根據將日深威福將日移陛下他日縱毅然去之不亦晚乎先帝已誤陛下豈宜再誤喬祺之言所當亟行也夫日月惟至明故其照臨之所及不以遠而弗及天地惟至健故時乎秋冬肅殺之氣斷斷而不移伏望陛下不以遐遺推廣原復衛道丘養浩之心將充軍豐熙余寬等為民張漢卿郭摶等謫官呂摶等慨然召還一體叙復寬免不以邇泄充大罷黜崔文之斷將王堂一體黜退谷大用發回孝陵司

香另選內臣中謹厚者以充任使則陛下之至明
與日月同照陛下之英斷與天地同流不特前二
事為天下鼓舞懼忻翕然稱誦而已也臣過蒙任使
遠在萬里犬馬微誠昧死上干天聽不勝隕越悚
懼之至

宥言官以弘化理疏

程啓充

先任給事中楊言題稱王邦奇奏告不實事件節奉
欽依楊言輕率妄言對品調外任欽此續該吏部擬
除外伏念國家之患莫大于壅蔽人臣之罪莫重于
僥倖壅蔽則忠言遠而是非不明僥倖則觀望多而
紀綱廢壞古之聖王深為此懼于是立敢諫之設設

進善之旌復置言師以言為職不匡之墨國有常刑
古稱從諫如流又曰從諫弗咈三代而下此道漸衰
以順旨為納忠以諫諍為揚惡小人巧于揣度其言
委曲逢迎君子期于責難其辭忠鯁剴切時之治亂
亦係于茲 陛下宵旰憂勤勵精圖治往者給事中
衛道御史丘養浩魏有本曾存仁相繼以言獲罪
聖恩通賜保全蓋 天地之德原本好生故雷霆之
威終期開霽優容收錄並無遐遺可見 聖德含弘
光被萬有邇者王邦奇流言動衆大肆猖狂 陛下
勅付外廷多官鞠訊群臣悚惕莫敢出聲揚言冒昧
上陳似為不知避忌其區區之心實欲因言以盡其

職也因事以效其忠也臣等皆以不言為羞楊言顧以敢言獲罪下同輿阜備受嚴刑情既不申復斥外任此等用舍何以勵臣工示天下哉况其官為給事以言為職參與會問之末初無出位之嫌縱使言有過激不猶愈于不言者乎狂悖輕率不猶愈于觀望者乎今使不言者守官觀望者任使而敢言者出之外任恐非陛下求治之初心也若使人各以言為諱禍幾病蠱誰則發之舜之好問好察不以芻蕘而或遺禹聞善言則拜固嘗屈已以求諫誠知夫進言之難而導之使言也故曰國將興賞諫又曰君仁則臣直又曰主聖則臣直有如臣言陛下仁且聖矣

貰而復之國家之興不在是乎伏望 皇上念 祖宗設官之意宥狂瞽逆耳之愚痛懲壅蔽依違將楊言復還原職庶幾聽言之知使過之仁圖治之勇三者備焉所得多矣

宥言官以廣 聖德疏

沈漢

近該試監察御史魏有本題為明用舍以肅軍政以安邊陲事奉 聖旨馬永出位妄言欲為逆臣奏請卹典朝廷已從寬發落魏有本這廝如何又行論救外任該衙門知道欽此臣聞有官守者修其職有言責者盡其忠此先正之格言而實後世為人臣者之

龜鑑也馬永武臣也身為上將手握重兵折衝禦侮
戢衆安邊其職業也顧不務此而出位妄言陛下
罪之誠是矣而魏有本復為之論救者豈以永之職
為當言耶又豈以永之所言為是耶蓋以永之在邊
智勇過人韜畧出衆士卒感其惠外夷畏其威寔
陛下干城之將也其為陸完奏乞卹典所言雖非然
陸完已死矣子孫已微矣聲勢無所可托富貴無所
可求其心猶可亮耳昔齊威王使章子為將以應秦
師使者言章子以齊入秦齊王不應後章子大敗秦
師左右曰王何以知章子之不叛矣曰章子為人子
而不欺死父豈為人臣而欺生君哉魏有本之意以

永不過受知於陸完尚思圖報於既死之後不忍負之又況荷陛下生成之恩覆讐之德其圖報稱於國家者又當何如耶故有本畧其言而取其意錄其功而悲其罪是以爲之論救耳今陛下遽斥逐之不已過乎夫有本諫官也非馬永將官之比也官以諫爲名則天下之得失利病皆得而言之其言是固當從之其言非亦當容之何者以諫官之職在於此也陛下責馬永出位妄言而有本之所言則非爲出位陛下責馬永不修本等職業而有本之建言正修其職業今陛下於有本之言不惟不聽之又從而尤之則非祖宗建官之本意亦非陛下用

有本之初心似與近日責馬永之

明旨不合也漢

唐令主一遇天災必求直言敢諫以明

朝政闕失

陛下上法高宗遠媿光舜近因四方奏報災異

詔令臣工同加修省其有利弊興革事宜還會官議
擬來看即是 聖帝明王克謹天戒之盛心也顧方

求言而罪人言是徒有求言之名而無求言之實臣

恐天下皆以言為譁杜諍臣之口塞諫者之心甚非

國家之福也以是而欲弭灾致祥胡可得乎伏望

皇上怒狂瞽之言開進言之路少霽 天威收回

成命 勅下吏部復還魏有本原職使之照舊供事
倘以時方試職輕率遽言或量加罰俸以薄示懲戒

則陛下無拒諫之失而益廣從諫之量威德無疆
令名永世矣天下幸甚

仰戴天恩恭陳末議以隆至治疏 馮成能

恭惟陛下自臨御以來 聖德含宏虛懷延納中外進言者悉荷兼容此誠堯舜翕受敷施之量四海方切頌揚以為太平可指日待矣乃近日內閣傳奉聖諭朕即位以來賴卿等輔弼近來科道等官不諳事體本內敢屢次欺言是何意卿等詳處來說欽此一時科道諸臣誠切驚疑茫然莫知所自皇皇若無所容者待罪數日以來荷蒙陛下天地之量曲賜優容以此知陛下本無厭言之心偶因一二言

者辭涉竦狂故發一綸音以為後警耳至德至仁臣等得於親承者誠感激無地但嚴切之聖諭方傳播於群臣而容納之仁言未宣昭於天下恐千里之外四海臣民未知聖意所在妄疑陛下不樂直言而從此以言為諱大非所以彰聖德而勸將來也臣至愚極陋屢進狂言屢蒙採納感戴天恩誠願以身殉國家者當此之際正言路通塞世道理亂之機故敢仰窺聖意懇効愚忠惟陛下垂聽馬臣聞君仁則臣直故必有不世之仁君而後有不阿之直士尤必有不阿之直士而益足以顯不世之仁君二者常相湏而成也故漢書云明主不惡切諫

以博觀忠臣不避重誅以直諫治功昭當時而芳聲垂後世者用此道耳 陛下聖明御宇化理維新諸臣際遇昌期各思靖獻是以數月以來章疏籍籍

陛下自一處觀之誠覺其煩然自諸臣人各懷忠者尚猶以為少也但才識不同見聞亦異故或有激於意氣涉於風聞而齷蹉影響誠如 聖諭所謂不諳事體者臣等反身循省誠愧竦汗下仰服 聖明矣

若謂之有欺者則諸臣之所不敢也人臣之罪莫大於欺諸臣志在效忠安敢有此孔子論事君曰勿欺也而犯之然則犯者固所以為忠非所以為欺也苟其心之不欺則無論其言之當否在熟蓄而竝容即

其諳事體者行之不諳事體者置之在聖明之決擇耳譬諸一身以耳目司見聞以一心為主宰固不可盡信耳目而即措之行然謂耳目之見聞有未善可也而遂疑耳目之欺我也寧有是哉天地之容物也非必鱗鳳也鷹鶲虎豹無不畜焉非必珠玉也蟠木礪石無不具焉君人者固效天而法地者也使非純良憲直並列于朝嘉言迂說並聞於上其何以示天地無所不容之量哉夫容一言之不當者則百當者集罪一言之不當者則百當者離何者尚忠之士進不關人主喜怒退不顧一身安危者千百之一二也其次則上下無度是非利害並存於中係乎上之

所導耳故明開導而求諫和顏色而受之猶恐士之畏懦而不敢進若責而詰之則忠言日希而讒謗者至國是將日非矣天下之患尤不可言者安可勿慮也昔唐太宗嘗責王珪溫彥博附上罔下而次日謂房玄齡曰自古帝王納諫固難朕夙夜庶幾於前聖昨責珪等痛自悔之公等勿因是而不進諫言是太宗始雖責之終則悔之又誘之使言其益廣聰明而成貞觀之治宜矣陛下固將上法堯舜者何有於太宗前者之 諭固即太宗之責臣下者今豈無悔心導之使諫若太宗之諭玄齡者況今災變頻仍霪雨大水若大同之水雹遼東之火旗尤為大異者此

正側身修行下詔求言之時也伏望陛下法天
地之兼容師帝王之遐軌渙發德音昭示天下凡
朝政之得失生民之利病人才之邪正仍許科道等
官直言無隱廣開衆正之路大昭無我之公使天下
曉然知前日之諭乃一時有爲之言而非陛下
之本意直言骨鯁之風播行於廊廟而懷忠積學之
士莫不興起而願行其志則忠言日聞聖德日廣
而合天下以成仁即唐虞熙皞之風復見於今日矣
夫人君德莫大於改過明莫大於從諫自惟邪臣欲
阻塞言路以自便已私者則曰諫官彰君之過不知
攻君之過者正所以彰君之美也不一察而惑之則

壅蔽之禍將無所不至矣惟 聖明其坐照焉臣愚
忠激切于冒 天威無任悚慄待罪之至

陳末議以重臺諫疏

王時舉

臣切惟糾正百僚察舉奸弊臺諫之職也 凡人之情
恒欲諱已之過而已之所以處人者又孰肯盡言以
招尤也 惟臺諫之職則發人之姦奪人之爵甚至律
人之罪咸任怨而不辭或機伏隱微事關利害雖身
冒艱危即抗言而無忌非是者則有辱臺之罰此其
職宜然雖欲辭之而不可得矣使其持之不專而人
得以撓之任之不重而復有以禁之臣恐智巧之士
皆將緘默而苟容之矣非所以廣聽聞而防壅蔽也

臣猥以庸愚待罪諫末即臺諫之當重者條為二事
仰瀆天聽伏乞勅下都察院再加詳議施行則
憲體崇而言路開矣一懲報復以倡敢言之氣臣每
見內而科道外而撫按凡有糾劾我皇上必下之
該部覆議者何哉蓋以言官之論列或出風聞人才
之難得尤宜愛恤故必廣之咨訪考其素行可留則
留可去則去公是公非自有定議未嘗專以言官之
言為然也故被劾之臣惟宜杜門省愆以聽上命
可也或心迹未明具疏自白可也若乃私逞胸臆摭
拾浮詞徑欲罷斥言官其阻壞憲體也亦甚矣此風
漸長臣恐言者之杜口橫議之紛紜而奸邪不得以

上聞也伏望 皇上軫念耳目重寄敢言為難今後
凡被劾官員希圖報復輒將言官指摘論劾罷斥者
查照律例重加究治庶諫臣不致構陷而奸邪知所
警懼矣伏乞 聖裁一重再劾以發未盡之奸臣查
得糾舉官員若已有 旨發落不許再劾蓋以生殺
予奪悉聽 上命若 旨下而復劾之恐非肅將
明命之意其制固未嘗不美也但 皇上之所俞允
者乃與衆共定之者也初非有意必於其間也惟其
善而莫之違也固云美矣第恐佞巧之奸恃彌縫而
漏網狙詐之徒依城社而脫罪封疆之臣掩覆敗以
為功有一於此其關係豈渺小哉苟盡諉之曰業已

有旨而不敢再劾焉則奸愈長而弊愈滋矣非杜漸剪萌之道也伏望皇上兼聽並觀取人為善凡各部覆奏事宜如有未盡之奸悉聽言官再劾則人無遺奸而忠悃得以悉輸矣伏乞聖裁